

flatus, qui huius symptomatis causa fuit. Alui quoque excrementa in scrotum deuoluta, atque ibi retenta, voluulum significat affectum, per quem excitatur foetidus vomitus, interdum stercus hominis redolens. Quinetiam vrinae suppressio vitium in renibus, aut vretheribus, aut vesica significat: sed si renum vitio supprimitur vrina, dolor grauis lumbos exercet: abdomen totum tumescit, atque vultus. Quoties enim renum imbecillitate vrina ad vretheras pelli non potest, in peritonei sinum refluit, atque hydropem accersit. Ac si ex obstructis vrinae vijs ac ductibus vrina reprimitur, dolor ad vtrumque ventris latus pectinem vsque exporrectus, ægrotū affligit. Supprimitur etiam vrina diuturnis vomitionibus, atque copiosis sudoribus, propterea quòd à renibus & vretheribus ipsa ad ventriculum, aut totius corporis habitum refluit. Denique vrina supprimitur ardentibus febris atque etiam delirijs, & magnis alui profluuijs.

In loco & situ sedes affectas & earum affectus dignosci.

CAP. III.

Situs porrò tum doloris, tum tumoris, affectæ sedis index est. Propterea si dolor in dextro hypochondrio sentitur,